



Inatsisartunut ilaasortaq, Jens Napâtôk  
Partii Naleraq

## **Umiarsualivinni atuisunik akiliuteqartitsisarneq pillugu § 37 naapertorlugu apeqquteqaammut 2020-104-imut akissut**

01-07-2020  
Suliap nr.: 2020 - 10604  
ID nr. 54186619

Asasara Jens Napâtôk

Umiarsualivinni akiliuteqartitsisarneq pillugu Inatsisartut Suleriaasianni § 37 naapertorlugu umiarsualivinni atuisunik akiliuteqartitsisarneq pillugu Naalakkersuisunut apeqquteqarputit. Apeqqutitit uannut akisassanngorlugit innersuunneqarput. Apeqqutit ataasiakkaarlugit matuma kinguliani issuarneqarput, akissuteqaat kingornanniilluni.

Postboks 909  
3900 Nuuk  
Tlf.: (+299) 34 50 00  
E-mail: box909@nanoq.gl  
Fax: (+299) 34 63 56  
www.naalakkersuisut.gl

### **1. Aalisartut umiatsiaararsortut angallatillu anginerumaartut Sikuki Nuuk Harbour A/S-imut Umiarsualivinnik atuisarnerminnut akiliuteqartarnerat aamma illoqarfinni allani atugaalerniarloq tusarparput, illoqarfinni sorlarni maannakut atuuppa?**

*Akissut:* Aallarniutigalugu erseqqissarneqassaaq, Aningaasaqarnikkut ingerlatsineq pillugu Nalunaarusiaq 2020-imi oqaatigineqartutut aammalu piffissami kingullertigut tusagassiuutitigut sammineqartutut, atuisunik akiliuteqartitsineq akitsuusiinerunngitsoq.

Atuisut akiliutaat kiffartuussinernut, pisumi matumani umiarsualivinni, aningaasalersuinnermut atorneqartussaapput. Atuisut akiliuteqartinneqannginneranni kiffartuussinerit taakkua tamatumunnga taarsiullugu akileraarutitigut toqqaannartumik aningaasalersorneqartussaapput. Akissuteqaammi naatsorsuutigineqarpoq atuisunik akiliuteqartitsineq pineqartoq, aammalu apeqqutigineqartutut akitsuusiineq pineqanngitsoq.

Umiarsuit takornariartaatit aamma aalisariutit nunanit allaneersut ullumikkut nunatsinni umiarsualivinni tamaginni umiarsualivimmu akitsuummik akiliisarput. Taamaattoq akitsuutit akileraarutaapput, taamaalillutik nunap karsianut tutsinneqartarlutik, kisiannili atuisut akiliutaat umiarsualiviutileqatigiiffimmu tutsinneqartarlutik.

Atuisut akiliutaat Sikuki Nuuk Harbour A/S-imut atuuttut, Nuummi Sikuki Nuuk Harbour A/S-ip umiarsualiveqarfianut taamaallaat atuuppoq. Sumiiffinni allani atuisunik akiliuteqartitsisarneq suli atuutsinneqalinngilaq.

### **2. Aalisartuaqqanut umiarsualivinnik atuinermut akiliisitsisarneq illoqarfinni sorlarni aamma qaqugu atuutsinneqalissava?**

*Akissut:* Sumi imaluunniit qaqugu, suli aalajangiiffigineqanngilaq. Taamaattoq umiarsualivinni atuisut akiliuteqartinneqartarnerat atuutsikkiartuaarneqassasoq, umiarsualivinnut inatsimmi (umiarsualiviit pillugit Inatsisartut inatsisaat nr. 9, 3. juni 2015-imeersoq) siunnerfigineqarpoq. Atuutsitsiartuaalernissamut tunngatillugu Nuuk siulliullugu alloriarfigineqarpoq. Taamaalilluni atuisut akiliuteqartinneqartalernissaannut illoqarfinni anginerusuni atuutsitsilernissaq alloriarnerup tullerissagaa ilimanaateqarluinnarpoq.

Atuisut akiliuteqartinneqartalerannik atuutsiartuaarnissaq pillugu suliaqarnermut ilaatillugu soqutigisaqartut oqaloqatigineqartussaapput.

### **3. Umiarsualiverqarnikkut ingerlatseqatigiiffiit pisariqanngitsut soorlu Sikuki akitsorsaataaginnartut Naalakkersuisut atorunnaarsinniartaat?**

*Akissut:* Sikuki Nuuk Harbour A/S umiarsualiviutileqatigiiffik pisariaqanngitsoq, Naalakkersuisut isumaqatiginngilaat. Paarlattuanik Sikuki Nuuk Harbour A/S pikkoriffigilluinnakkaminik suliaqartoq, aammalu Nuummi umiarsualivimmik ingerlatsineq malunnaatilimmik pitsaanerulersissimagaa, Naalakkersuisut misigaat. Tamatuma saniatigut nunarsuaq tamakkerlugu umiarsualivinnut piumasaqaatit ingerlaavartumik annertusiartorput, tamannalu aamma uagut nunatsinni naammassisinnaasariaqarparput. Umiarsuarnik nunanit tamalaaneersunik tikittoqarneranut atatillugu isumannaallisaaneq pillugu ilaatigut piumasaqaateqarpoq. Tamatumunnga avatangiisinut piumasaqaatit assigiinngitsut ingerlaavartumik annertusiartorput. Piumasaqaatit assigiinngitsutigut annertusiartortut umiarsualivinni naammassineqarsinnaassappata, umiarsualiviit ataasiakkaat, pingaartumillu umiarsualiviit umiarsuarnit nunanit allaneersunit tikinneqartartut, piumasaqaatinik naatsorsuutigineqartunillu kiisalu piumasaqaatinik nutaanik ingerlaavartumik atuutilertartunik naammassisinnaanissaminnut isumalluuteqarnissaat pisariaqarpoq.

### **4. RAL-ip Kommuunillu suleqatigiinnerisigut talittarfeqarnikkut isumaginninnerit akiliisitsisarnerillu naleqqunnerusut ingerlanneqarsinnaannginnamik?**

*Akissut:* Umiarsualivimmik ingerlatsinissamut periarfissarpassuaqartoq qularutissaanngilaq, aammalu umiarsualiviit pisariaqanngitsumik akisuumik ingerlatseqatigiiffittut iluseqalernissaannik pinngitsaalinissaat Naalakkersuisut siunertarinngilaat. Tassunga atatillugu oqaatigineqarsinnaavoq, Royal Arctic Line A/S, illoqarfinni najukkani umiarsualivimmut oqartussap suliassaannik suliaqartartoq, Naalakkersuisut suleqatigilluareermassuk. Nunaqarfinni KNI A/S-ip Naalakkersuisut sinnerlugit najukkani umiarsualivinni oqartussatut isumaginnittuuvoq.

Nunatsinni umiarsualivinnik ingerlatsinermut inerisaanermullu atatillugu kommunit iliuseqarnerullutik inissisimalersinnaanerat Naalakkersuisut aamma akerlerinngilaat.

Atuisunik akiliuteqartitsisalerneq atuuksinneqalernissaanut siunertaq pingaarneq tassaavoq, umiarsualivitsinni pitsaassutsip tamarmiusup qaffassarneqarnissaa. Qanoq pisoqaraluarpalluunniit, aammalu maannakkut umiarsualivinni aningaasaleeqqinnermut aningaasaliissutit maannakkutut annertussuseqaannassappata, umiarsualivinnut suliassaqarfimmut ataatsimut isigalugu annertunerusunik aningaasaliisoqartussaassaaq, taamaaliornermi pitsanngorsaannissamut tunngavissat ullumikkornit pitsaanerulissallutik.

Neriutigaara matuma siuliani apeqqutitit akineqarsimassasut.

Inussiarnersumik inuulluaqqusillunga

Karl Frederik Danielsen